

11/08/1998

PM sambut Sisavath

KUALA LUMPUR, Isnin - Perdana Menteri Laos, Sisavath Keobounphanh, yang tiba di sini hari ini untuk lawatan rasmi selama tiga hari, diberikan sambutan rasmi di dataran Parlimen di sini.

Ketibaan beliau dan isterinya, Khamla Keobounphanh, disambut oleh Perdana Menteri, Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali.

Lagu kebangsaan kedua-dua negara dimainkan sementara Sisavath memeriksa perbarisan hormat oleh pegawai dan anggota Batalion Pertama Regimen Askar Melayu Diraja (RAMD).

Perdana Menteri Laos itu kemudian diperkenalkan kepada anggota Kabinet dan kor diplomatik.

Sebelum itu, Sisavath dan isterinya disambut di Lapangan Terbang Antarabangsa Kuala Lumpur (KLIA) di Sepang oleh Timbalan Menteri Luar, Datuk Leo Michael Toyad dan Timbalan Menteri Sains, Teknologi dan Alam Sekitar, Datuk Abu Bakar Daud, selaku menteri pengiring.

Sisavath mengetuai delegasi 12 anggota, termasuk beberapa menteri dan pegawai.

Ini adalah lawatan pertama seorang ketua Kerajaan Laos sejak negara itu menyertai Asean pada Julai 1997.

Esok, delegasi Laos dan Malaysia dijadual mengadakan perbincangan dua hala mengenai kedudukan kewangan dan ekonomi di rantau ini dan usaha bersama mengatasi masalah itu.

Laos, sebuah negara yang terletak di tengah-tengah semenanjung Indochina, dijangka menandatangani perjanjian berkaitan dagangan dua hala dan kerjasama pelancongan dengan Malaysia.

Pemimpin Laos itu dan delegasinya juga akan mengadakan pertemuan dengan anggota Dewan Perniagaan dan Perindustrian Malaysia (NCCIM).

Malam ini, Dr Mahathir dan Dr Siti Hasmah akan mengadakan jamuan makan malam bagi meraikan tetamu dari Laos itu.

Sisavath dan Khamla dijangka mengadap Yang di-Pertuan Agong, Tuanku Ja'afar dan Raja Permaisuri Agong, Tuanku Najihah di Istana Negara, esok.

(END)